

ԵՐՎԱՆԴ ԳԱՆՈՒՍՏԻ ՏԵՐ-ՄԻՆԱՍՅԱՆ (Ծննդյան 145-ամյակի առթիվ)*

Երվանդ Տեր-Մինասյանը ծնվել է 1879 թ. նոյեմբերի 19-ին Արթիկի չրջանի Հառիճ գյուղում, Տեր Գալուստ քահանայի ընտանիքում: Տարրական կրթությունը ստացել է տեղի ծխական երկրասյան դպրոցում, որը բարձր առաջադիմությամբ ավարտել է 1892 թ.: Միևնույն տարում ընդունվել է Սբ. Էջմիածնի Գևորգյան ճեմարան, որտեղ աշակերտել է այնպիսի նշանավոր գիտնականների, ինչպես, օրինակ՝ Կարապետ ծ. վրդ. Տեր-Մկրտչյանը, Գարեգին վրդ. Հովսեփյանցը, Մեսրոպ վրդ. Տեր-Մովսիսյանը, գրաբարագետ Մկրտիչ Պալյանը, ռուսագետ-բանաստեղծ Լևոն Մանվելյանը, պատմաբան-բանասեր Կարապետ Կոստանյանը, Կոմիտաս Վարդապետը և այլք:



1900 թ. Ե. Տեր-Մինասյանը գերազանցությամբ ավարտում է Գևորգյան ճեմարանը՝ որպես ավարտաճառ ներկայացնելով «Հաղթատ և Սանահին վանքերը և նրանց նշանակությունը Հայոց պատմության մեջ»: Այն, իբրև այդպիսին, այնքան հաջող էր շարադրված, որ ճեմարանի տեսչության միջնորդությամբ, ի խորախույս հեղինակի, 1901 թ. հրատարակվում է «Արարատ» ամսագրում՝ որպես օրինակելի աշխատանք: Նույն թվականին Ե. Տեր-Մինասյանը նրբյան Հայրիկ կաթողիկոսի բարձր տնօրինությամբ ձեռնադրվում է սարկավագ և ուսման մեկնում Գերմանիա: 1900–1904 թթ. սովորում է Լայպցիգի և Բեռլինի համալսարաններում, որտեղ նրան դասավանդում են ժամանակի նշանավոր գիտնականներից Հառնակը, Հառկը, Յիմմերնը, Վունդտը, Լամպրեխտը, Էրմանը, Զախաուն և այլք: Նշված համալսարաններում նա խորամուխ է լինում քրիստոնեական եկեղեցու դավանանքի պատմության, արևելագիտության, Հին Կտակարան, եբրայեցերեն, ասորերեն ու փիլիսոփայության առարկաների ուսումնասիրության և յուրացման մեջ:

Դեռևս արտասահմանում սովորելու տարիներին՝ Ե. սարկավագ Տեր-Մինասյանը Գերմանիայից նյութեր էր ուղարկում «Արարատ»-ի խմբագրությանը: Մասնավոր հետաքրքրություն է ներկայացնում 1901 թ. ամսագրում հրատարակած «Աստուածաբանություն և Կրօնների ընդհանուր պատմություն» հոդվածը: Հեղինակի գիտական մտածողությունը, քննադատական հայացքը, վերլուծական միտքը և խորը կշռադատությունը միանգամից աչքի են զարնում: Հոդվածում նա անդրադառնում է աստվածաբանության և կրոնների ընդհանուր պատմության դասավանդման շուրջ գերմանական մտավոր շրջանակներում գոյություն ունեցող տարաձայնություններին:

* Ներկայացվել է 30. X. 2024 թ., ընդունվել է տպագրության 27. III. 2025 թ.:

Նպատակ ունենալով իր ուսումը ծառայեցնել ազգային եկեղեցու շահերին և դրանով հանդերձ նպաստել հայագիտության զարգացմանը՝ Ե. սարկավազ Տեր-Մինասյանն ուսման ընթացքում որպես ավարտաճառի նյութ ընտրում է հայ-ասորական եկեղեցիների հարաբերությունները: 1904 թ. ավարտաճառն արդեն պատրաստ էր: Նույն թվականին Բեռլինի համալսարան է ներկայացնում «Հայ եկեղեցու յարաբերությունները Ասորուց եկեղեցիների հետ մինչև Զ դարի վերջը» ուսումնասիրությունը, որը գնահատվում է գերազանց: Գերմանացի գիտնականները Ե. Տեր-Մինասյանին արժանացնում են փիլիսոփայության դոկտորի աստիճանի: Հիշյալ աշխատությունն այնուհետև նա ներկայացնում է Գիսենի համալսարանի աստվածաբանության ֆակուլտետ՝ աստվածաբանության լիցենցիատի գիտական աստիճան ստանալու նպատակով: Փակուլտետը, հաշվի առնելով աշխատության վերաբերյալ հնչած կարծիքները, առանց համապատասխան պարտադիր պաշտպանության նրան չնորհում է աստվածաբանության լիցենցիատի աստիճան:

1904 թ. Ե. Տեր-Մինասյանը վերադառնում է հայրենիք՝ իր հոգևոր ծննդավայր Մայր Աթոռ Սուրբ Էջմիածին: Գերմանիայի նրա հաջողությունները մեծ արձագանք էին գտել Սբ. Էջմիածնում՝ հպարտության և ոգևորության ալիք բարձրացնելով յուրայինների շրջանակում: Հայրապետական բարձր տնօրինությամբ Ե. սարկավազ Տեր-Մինասյանը ուսուցիչ է նշանակվում Գևորգյան ճեմարանում, որտեղ դասավանդում է գերմաներեն, Ընդհանուր եկեղեցու պատմություն, Կրոնների պատմություն, Հին հունական և միջնադարյան քրիստոնեական փիլիսոփայության պատմություն, Հին Կտակարանի աստվածաբանություն, Նոր Կտակարանի աստվածաբանություն, ինչպես նաև՝ Հայոց եկեղեցու պատմություն:

1904 թ. դեկտեմբերի 4-ին իրիմյան Հայրիկի բարեհաճ տնօրինությամբ նա ձեռնադրվում է որպես կուսակրոն քահանա, իսկ 1905 թ. Մայր Աթոռի լուսարարապետ Տ. Ղևոնդ եպս. Հովակիմյանի ձեռամբ նրան տրվում է վարդապետական մասնավոր աստիճան:

Երվանդ վարդապետ Տեր-Մինասյանը եկեղեցական ասպարեզում գործել է մինչև 1910 թ.: Հոգևորականի նրա գործունեությունը թեև կարճ ժամանակաշրջան է ընդգրկում, սակայն վերջինս կարողացել է նշանակալի ներդրում ունենալ Հայոց եկեղեցու գիտակրթական կյանքի զարգացման կարևոր գործում:

Ըստ այդմ՝ նրա էջմիածնական շրջանի գործունեությունը կարելի է պայմանականորեն բաժանել երկու փուլի. առաջին շրջանն ընդգրկում է 1904–1907 թթ., երկրորդը՝ 1907–1910 թթ.:

Հայ Առաքելական եկեղեցու սահմանադրության նախագծի, ազգային դպրոցական ծրագրի և կանոնադրության մշակման նպատակով Ամենայն Հայոց կաթողիկոս իրիմյան Հայրիկը 1906 թ. նախաձեռնում է ազգային-կենտրոնական ժողով գումարել Մայր Աթոռ Սբ. Էջմիածնում: Այս նպատակի իրականացման և ժողովի աշխատանքների համակարգման համար հայրապետական տնօրինությամբ կազմվում է հատուկ կարգադրիչ հանձնաժողով, որի կազմում Մայր Աթոռի գիտնական վարդապետներից ընդգրկվում են Կարապետ Ծ. վրդ. Տեր-Մկրտչյանը, Գարեգին վրդ. Հովսեփյանցը և Երվանդ վրդ. Տեր-Մինասյանը, իսկ աշխարհականներից՝ Հովհաննես Հովհաննիսյանը, Ստեփան Կանայանը, Մանուկ Աբեղյանը և Սիրական Տիգրանյանը: Սպասված ժողովը

գումարվում է 1906 թ. վերոհիշյալ իսկ վայրում: Սակայն ժողովականների գաղափարական հակասությունները թույլ չեն տալիս, որպեսզի այն իր բուն նպատակին ծառայի: Ժողովում առաջադրված կրթական ոլորտի բարեփոխությունների հարցն առաջնային կապվում էր Գևորգյան ճեմարանի հետ: Թեև ժողովը ձախողվեց, այնուամենայնիվ, մասնավորապես շարունակում էին հնչել կրթական բարեփոխումների անհրաժեշտության մասին կոչերը: Ե. վրդ. Տեր-Մինասյանը, ելնելով խնդրի արդիականությունից, «Արարատ»-ում հրապարակում է ճեմարանի բարեկարգության վերաբերյալ Կենտրոնական ժողովի պատվերով մանկավարժական խորհրդի կազմած ծրագիրը՝ լրացուցիչ իր առաջարկներով հանդերձ:

Ներկայացված ծրագիրը նպատակ էր հետապնդում «Ճեմարանը վերածել իսկական բարձրագույն դպրոցի՝ քառամեայ դասընթացքով և աստուածաբանական ու հայագիտական երկու բաժանմունքներով»: Ժողովը ղեկավարվել էր այն տրամաբանությամբ, որ անհրաժեշտ է աստվածաբանական առարկաների ուսումնասիրությունը պարտադրել այն ուսանողներին, ովքեր հոգևորական կամ աստվածաբան չէին դառնալու, և, ընդհակառակը, պետք էր հայագիտական առարկաներով ծանրաբեռնել նրանց, ովքեր կամենում էին խորանալ աստվածաբանության մեջ:

1907–1910 թթ. Ե. վրդ. Տեր-Մինասյանը, ճեմարանում ուսուցչությանը զուգահեռ, կաթողիկոսական տնօրինությամբ ստանձնում է նաև Մայր Աթոռի տպարանի կառավարչի պաշտոնը՝ միաժամանակ վարելով «Արարատ» ամսագրի խմբագրի օգնականի պարտականությունը: Այստեղ ևս Երվանդ վարդապետը ձգտում է օգտակար լինել խմբագրության աշխատանքներին՝ հակառակ իր բազմազբաղվածության:

1907 թ. նրա և Գարեգին վրդ. Հովսեփյանցի նախաձեռնությամբ «Արարատ» ամսագրում հանրապարհ լույս են տեսնում սոցիալական աստվածաբանության գերմանական դպրոցի հայտնի ներկայացուցիչ Ֆրիդրիխ Նաումանի (1860–1919) քարոզները հայերեն թարգմանությամբ:

Ամենայն հավանականությամբ, Երվանդ վարդապետն ու ընկերները Ֆ. Նաումանի քարոզների թարգմանությամբ նպատակադրվել էին գաղափարական այնպիսի միջոցառում ստեղծել, որը Հայոց եկեղեցուն կօգնեին հասարակական դիրքորոշում ձևավորել ժամանակի սոցիալական խնդիրների նկատմամբ:

1907 թ. Երվանդ վարդապետի եկեղեցագիտական գործունեությունը բնորոշվում է մի շատ կարևոր ձեռքբերումով, որը, հիմնականում, հայտնագործություն էր քրիստոնեական աշխարհի, մանավանդ՝ եկեղեցու պատմություն և դավանանքի զարգացում հետազոտող մասնագետների համար: Նրա ուսուցիչ Կարապետ Ժ. վրդ. Տեր-Մկրտչյանը Երևանի թեմակալութեան շրջանում 1904 թ. դեկտեմբերին, Երևանի Աբ. Կաթողիկե եկեղեցում պահվող ձեռագրերից մեկում պատահաբար հայտնաբերել էր մի շատ կարևոր հայրաբանական աշխատություն: Խոսքը Լիոնի եպիսկոպոս Իրենիոս Լուզդոնացու «Ցոյք առաքելական քարոզություններ» երկի մասին է, որը մինչ այդ կորած էր համարվում քրիստոնեական գրականության մեջ: Ինչպես Ե. Տեր-Մինասյանն է նկատում, Կ. Ժ. վրդ. Տեր-Մկրտչյանը, լինելով բազմազբաղ, ժամանակ չէր գտել վերոհիշյալ գործի ձեռագիրը պատրաստել և թարգմանել գերմաներեն: Այդ տարին հարմար առիթ

էր երկուսի համար էլ՝ իրենց նվիրելու հիշյալ գործի գերմաներեն թարգմանության և հրատարակության աշխատանքին: Ե. վրդ. Տեր-Մինասյանն ու Կ. ծ. վրդ. Տեր-Մկրտչյանը կյանքի են կոչում Իրենիոսի վերահիշյալ գործի հրատարակությունը. այն 1907 թ. տպագրվում է Ադոլֆ Հառնակի խմբագրությամբ լույս տեսնող “Texte und Untersuchungen Zur Geschichte der altchristlichen Literatur” ժողովածուում: Իրենիոսի գործի հրատարակությունը եվրոպական գիտնականների շրջանակներում մեծ հետաքրքրություն է առաջացնում համբավի արժանացնելով նրա թարգմանիչներին և հրատարակիչներին, որոնք գերմանական գիտնականների շրջանակներում արդեն որոշակի ճանաչում էին վայելում: Նրանց աշխատասիրությամբ տպագրված վերահիշյալ գործը 1908 թ. վերստին հրատարակվում է որպես վերանայված հրատարակություն:

Ե. վրդ. Տեր-Մինասյանի էջմիածնական գործունեության երկրորդ շրջանում մասնավորապես առանձնանում է 1908 թվականը: Գևորգյան ճեմարանի հարկից ներս նա ձեռնամուխ էր եղել իր դասավանդած առարկաների համար դասադրքեր պատրաստելու պատասխանատու և տքնաջան աշխատանքին: Այդ թվականին Մայր Աթոռի տպարանում լույս է տեսնում նրա կազմած «Ընդհանուր եկեղեցական պատմություն» դասագրքի առաջին հատորը, որն ընդգրկում էր հին եկեղեցու շրջանի պատմությունը: Երվանդ վարդապետը ծրագրում էր նաև երկրորդ հատորի հրատարակությունը, որն ընդգրկելու էր քրիստոնեական եկեղեցու միջնադարյան և նոր շրջանի պատմությունները: Առաջաբանում վարդապետը գիտնականի բարեխղճությամբ նշում է, որ ողջ աշխատությունը քաղվածք է գերմանական գիտության լավագույն դասադրքերից ու մասնագիտական այլ աշխատանքներից: Դասագրքի կազմման համար հիմք են ծառայել ոչ միայն գերմանալեզու հայտնի տպագիր հրատարակությունները, այլև իր ուսուցչապետների անտիպ դասախոսությունները: Տեղին է նշել, որ մինչ օրս Երվանդ վարդապետի կազմած «Ընդհանուր եկեղեցական պատմություն» դասագիրքն օգտագործվում է Հայոց եկեղեցու հոգևոր կրթօջախներում:

1908 թ. հունվարի 29-ին Ե. վարդապետ Տեր-Մինասյանը Գևորգյան ճեմարանում կարդում է «Բաբելոնը և Սուրբ Գիրքը» վերտառությամբ դասախոսություն, որի ստեղծման համար հիմք էին ծառայել Գևորգյան ճեմարանում դասավանդած Ծննդոց Գրքի մեկնություն, Հին Կտակարանի աստվածաբանություն առարկաները: Նույն թվականին նշված դասախոսությունը հոգվածի տեսքով հրատարակվում է «Արարատ» ամսագրի երրորդ համարում, որին նույն տարում հաջորդում է նաև առանձնատիպի հրատարակությունը՝ «Բաբելոն և Սուրբ Գիրք (յաւելուած Գիւղամէշի վէպի)» վերնագրով: Դասախոսությունը, հեղինակի իսկ ծանոթագրությամբ, հիմնականում քաղված էր իր ուսուցիչների հայտնի արևելագետներ Յիմեռնի, Գունկելի և Վինկլերի աշխատություններից: Երվանդ վարդապետի այս աշխատության լույսընծայումը պայմանավորված էր նաև ժամանակի արևելագիտության մեջ տեղի ունեցող զարգացումներով: Դեռևս 1902 թ. Բեռլինի համալսարանի ասորագիտության հայտնի պրոֆեսոր Ֆրանց Հոլցիուս Դելիչը “Babel und Bibel” վերնագրով մի դասախոսություն է կարդում, որի առաջ բերած հետաքրքրությունը պատճառ է դառնում, որպեսզի այն վերահրատարակվի երկու անգամ՝ 1903 և 1905 թթ.: Երվանդ վարդապետն ուշադիր հետևում էր տեղի ունեցող զարգացումներին՝ նախան-

ձախնդրորեն ձգտելով այդ քննարկումները ներմուծել հայագիտական շրջանակ: Ծանոթ լինելով Դելիչի արմատական մոտեցմանը՝ ուսուցիչների աշխատությունների հետևողությամբ նա իր ուսումնասիրությունը կառուցում է ավելի համեմատական տեսանկյունից՝ հանգամանորեն քննելով աշխարհաստեղծման բաբելական և իսրայելական առասպելների հարաբերակցությանն առնչվող խնդիրները:

1908 թ. Ե. վրդ. Տեր-Մինասյանը հայերենի է փոխադրում և հրատարակում իր դոկտորական ատենախոսությունը՝ «Հայոց եկեղեցու յարաբերությունները Աստուծոց եկեղեցիների հետ հայկական և ասորական աղբյուրների համաձայն»: Աշխատությունը, ինչպես հեղինակն է նշում հայերեն հրատարակության առաջաբանում, «յուկ թարգմանություն է մեր գերմաներեն գրքից, այլ մեծ չափով ճոխացրած է և ընդարձակած»: Տեղին է նկատել, որ նախքան աշխատության ընդարձակ հայերեն վերահրատարակությունը, ինչպես նաև՝ դրանից հետո, նա պարբերաբար անդրադարձել է իր ուսումնասիրությանն առնչվող մի շարք խնդիրների: Ասվածը մասնավորապես վերաբերում է նրա հետևյալ աշխատություններին՝ «Այսպես կոչված Պարսից ժողովրդ» (1907), «Մանագլերտի 726-ի ժողովի վեց ասորի եպիսկոպոսները և Նոսրուվիկ թարգմանչի հիշած երկու ասորական վանքերը» (1907), «Բաբելոն Կաթողիկոսի ժողովի թվականը և տեղը» (1908), «Կնիք Հաւատոյ» ժողովածուն և Հայոց եկեղեցու դավանաբանական դիրքը Զ և է դարերում» (1921–1922), «Նեստորականությունը Հայաստանում» (1946), «Տիմոթեոս Կուզի «Հակաճառություն առ սահմանեալսն ի ժողովոյն Քաղկեդոնի» (1960): Նշված աշխատություններից առաջին երեքն ամփոփում են Ե. Տեր-Մինասյանի դոկտորական ատենախոսության որոշ առանցքային դրույթներ:

1908 թ. Երվանդ վարդապետի գիտական գործունեությունը նշանավորվում է մեկ այլ կարևոր քրիստոնեական հուշարձանի՝ Տիմոթեոս Կուզի «Հակաճառություն առ սահմանեալսն ի ժողովոյն Քաղկեդոնի» հակաքաղկեդոնական երկի հրատարակությամբ: Այս գործը, ի դեպ, հունարեն բնագրով չի պահպանվել. գիտությունն առայժմ հայտնի են միայն ասորերեն և հայերեն թարգմանությունները: Ե. վրդ. Տեր-Մինասյանը Կ. ծ. վրդ. Տեր-Մկրտչյանի հետ ձեռնամուխ են լինում բնագրի պատրաստմանն ու հրատարակմանը: Բնագիրը հրատարակվում է 1908 թ. Մայր Աթոռի տպարանում՝ Սուքիաս արքեպս. Պարզյանցի դրամական օժանդակությամբ:

1908 թ. թեև գիտական իմաստով բեղուն էր Ե. վրդ. Տեր-Մինասյանի գործունեության համար, սակայն այն բեկումնային եղավ նրա հետագա գործունեության առումով՝ իբրև կուսակրոն եկեղեցական: Բանն այն է, որ Երվանդ վարդապետին խիստ մտահոգում էր Հայոց եկեղեցու բարեկարգության խնդիրը, ինչպես և տվյալ ժամանակաշրջանում գործող շատ հոգևորական և աշխարհական անձանց, ովքեր մեծ փափագ ունեին տեսնել եկեղեցին և նրա առաքելությունն ավելի արդյունավետ, ավելի ներգրավված հայրենի կյանքից ներս: «Արարատ» ամսագրում Երվանդ վարդապետը հաջորդաբար երկու հոդված է հրատարակում Հայոց եկեղեցու բարեկարգության վերաբերյալ՝ «Վերանորոգության կարիքը Հայոց եկեղեցու համար» և «Հայոց եկեղեցու վերանորոգության խնդիրը»: Հիշյալ քննարկումներում խոսքը վերաբերում է այն հարցին, թե Հայոց եկեղեցին արդյո՞ք կարիք ունի բարեկարգման, որի վերաբերյալ

մամուլում տարբեր առիթներով հրապարակումներով հանդես էին գալիս եկեղեցական, մտավորական և հասարակական տարբեր գործիչներ: Հոգևածներում նա այն միտքն է արտահայտում, թե մարդկային մտածողության մեջ լուրջ փոփոխություններ են տեղի ունեցել, որի արդյունքում երևան են եկել եկեղեցու և կրոնի իրավունքը մերժող նոր տեսություններ: Այս իրավիճակում, ըստ նրա, եկեղեցին ու կրոնի ներկայացուցիչներն իրավունք չունեն հայեցողական դիրք գրավել և սպասել, թե ինչ կլինի. այլ պետք է սթափվեն ու մտածեն՝ ինչ է ակնկալում մարդկությունը կրոնից ու եկեղեցուց: Ե. վրդ. Տեր-Մինասյանը հոետորական հարցադրում է անում. արդյո՞ք եկեղեցին պետք է մնա իր ներկա դրությունից, թե՞ պետք է նորոգի ներկայանա աշխարհին ու մարդկությանը: Նա իր հրապարակումներում առաջարկում է մի շարք բարեփոխումներ իրականացնել Հայ Առաքելական եկեղեցում, մասնավորապես՝ եկեղեցական դավանանքի, պաշտամունքի և վարչական կազմակերպության բնագավառներում: Նրա հիմնական մտեցումն այն էր, որ եկեղեցին երբևէ չի կապվել որևէ պատմական ժամանակաշրջանի հետ, այլ միշտ ընդառաջ գնալով ժամանակի մտավոր հոսանքներին՝ վերցրել է դրանցից լավագույնը՝ հարմարեցնելով այն իր աշխարհայացքին: Երվանդ վարդապետն իր տեսակետը հիմնավորում է հատկապես քրիստոնեության և նորապատոնական փոխոստիալության միջև նկատելի կապը մատնանշելու օրինակով՝ եկեղեցական իշխանությունն առաջարկելով քրիստոնեական ուսմունքը հասարակությանը ներկայացնել արդի աշխարհայացքի և փոխոստիալության նորագույն նվաճումների հիման վրա: Պաշտամունքի վերաբերյալ էլ առաջարկ է անում փոխել ծեսի լեզուն՝ գրաբարի փոխարեն կիրառելով բոլորի համար հասկանալի աշխարհաբարը, որոշակի կրճատումներ անել ժամերգությունների մեջ, և դրանք ճոխացնել համապատասխան գեղեցիկ երգեցողությամբ: Նա շեշտում է նաև քարոզի կարևորությունը քրիստոնյայի կենցաղում՝ առաջարկելով դրան ավելի մեծ տեղ հատկացնել պաշտամունքային կյանքում և եկեղեցու հովվական առաքելությունից ներս:

Երվանդ վարդապետի վերոնշյալ հոգևածներն աղմուկ են հարուցում նրա անձի ու հայացքների շուրջ թե՛ եկեղեցու ներսում և թե՛ դրսում: Նման զարգացումը, ամենայն հավանականությամբ, պայմանավորված էր քրիստոնեական եկեղեցու դավանանքի վերաբերյալ արտահայտած նրա արմատական տեսակետներով: Նա առաջարկում էր մշակել քրիստոնեական նոր դավանանք, քանի որ ներկա դավանանքն արտահայտում է V դարի եկեղեցու համոզումը: Սա, իհարկե, կասկածի տակ էր դնում քրիստոնեական դավանանքի հայտնությունական բնույթը՝ Սուրբ Գրքի հեղինակությունը, եկեղեցու ավանդությունը: Այստեղ Ե. վրդ. Տեր-Մինասյանը, ըստ էության, կրում է գերմանական լիբերալ-աստվածաբանական դպրոցի վառ ներկայացուցչի՝ իր ուսուցչապետ Հառնակի ազդեցությունը: Վերջինս եկեղեցական դավանանքը դիտում էր քրիստոնեության հեղինականացման արդյունք, որից, նրա կարծիքով, պետք էր ազատագրել Քրիստոսի քարոզը: Հառնակն իր արմատականության պատճառով ընդունված էր նույնիսկ բողոքական շրջանակներում, էլ ուր մնաց որ Երվանդ վարդապետի «Հավատո հանգանակը» վերացնելու կոչն ընդդիմության կամ քննադատության չարժանանար Հայոց եկեղեցում, որը հնուց անտի հայտնի է

իր դավանանքի պահպանողականությունը և քրիստոնեական եկեղեցու սրբազան ավանդության հանդեպ զարգացրած հատուկ վերաբերմունքով:

Թեև ստեղծված միջոցառումը Ե. Վրդ. Տեր-Մինասյանի համար հոգեբանորեն ճնշող էր, այնուամենայնիվ, նա շարունակում էր իր արդյունավետ գործունեությունը Մայր Աթոռում. տպարանի կառավարչի գործին զուգահեռ՝ Գևորգյան ճեմարանում կենտրոնանում է մասնավորապես ուսուցչության վրա: 1909 թ. նրա եկեղեցագիտական գործունեության մեջ հրատարակությունների առումով ևս բեղմնավոր էր. Գևորգյան ճեմարանի սաների համար լույս է ընծայում մեկ այլ դասագիրք: Խոսքը «Կրօնների պատմություն» աշխատության մասին է: Մյուս դասագրքերի նման այստեղ՝ առաջաբանում, ևս հեղինակը նշում է, որ ներկայացվող նյութը հիմնականում քաղվածք է վերջին շրջանի մասնագիտական ուսումնասիրությունների՝ հավանության արժանացած եզրակացություններից, ինչպես նաև հավելում՝ կրոնների պատմություն առարկան դասավանդելով՝ «տեսանք, որ պակասում է մի այնպիսի գիրք, թե՛ հայերէն և թե՛ ռուսերէն լեզուներով, որի մէջ ամփոփուած լինեն արդի գիտական ուսումնասիրությունների եզրակացությունները»: Այն իրողությունը, որ նույնիսկ ռուսերենով նման դասագիրք չկար, մի խոստովակայություն է՝ Հայոց եկեղեցու մտավորական սպասավորների անխոնջ և նախանձախնդիր ջանքերի շնորհիվ մեր հոգևոր-կրթական հաստատություններն իրենց գիտական մակարդակով XX դարասկզբին հավակնել են գերազանցել Ռուս Ուղղափառ եկեղեցու հոգևոր կրթարաններին: «Կրօնների պատմություն» դասագրքի առաջաբանի վերջում Երվանդ վարդապետը նշում է, որ «այս ձեռնարկն էլ ոչ միայն ձեմարանի ուսանողների համար է կազմուած, այլ ի նկատի ունի նաև առհասարակ բոլոր կրօնների պատմութեամբ հետաքրքրուողներին»: Սա գալիս է հիմնավորելու մեր այն դիտարկումը, որ Երվանդ վարդապետն իր երկասիրություններով ցանկանում էր Հայոց եկեղեցում տեսնել կրոնապես կրթված քրիստոնյա հասարակություն: Այս մասին նա անդրադարձել է նաև 1908 թ. Հայոց եկեղեցու բարեփոխության թեմաներով «Արարատ»-ում հրատարակած հոդվածներում:

1909 թ. «Կրօնների պատմություն» հետևում է մեկ այլ կարևոր աշխատության հրատարակություն՝ «Յիսուսի կեանքը ու գործունեությունը»: Շարադրանքը հիմնված էր գերմանացի երկու նշանավոր աստվածաբան-նորկտակարանագետների՝ Պ. Շմիդտի և Ռ. Օտտոյի երկերի վրա: Այս աշխատությունը կարող էր Գևորգյան ճեմարանում Նոր Կտակարանի աստվածաբանության դասավանդման համար կատարել օժանդակ ձեռնարկի դեր: Նկատի ունենալով, որ Երվանդ վարդապետը ճեմարանի դասարանական բաժիններում ավանդում էր Ուսումն Սբ. Գրոց առարկան, հավանաբար, հիշյալ երկի ստեղծումը նույնպես պետք է նույնացնել ճեմարանում համանուն առարկայի հիմքերի ամրապնդման հետ: Գրքի ներածական բաժնում նա ընդհանուր գծերով ցույց է տալիս, որ վերջին շրջանում աստվածաշնչագիտության բնագավառում Նոր Կտակարանի գրքերը «խիստ քննադատության ենթարկվեցին պատմական, կրօնապատմական և լեզվաբանական գիտությունների միջոցներով և մեթոդներով»: Երվանդ վարդապետը, այնուհետև հիմնվելով պատմաքննաբանական մեթոդի վրա, շեշտում է Պողոս առաքյալի չորս մեծ թղթերի (Գաղատացիս, Ա և Բ Կորնթացիս և Հռոմեացիս) ու համատես Ավետարանների (Մարկոս, Մատթեոս

և Ղուկաս) աղբյուրագիտական նշանակությունը Հիսուսի պատմական կերպարի վերականգնման համար: Էջմիածնի Սինոդը, սակայն, գրաքննությանը չխոչընդոտեց գրքի լույսընծայումը. այս հանգամանքը վկայում է, որ Երվանդ վարդապետի գործունեության համար միջնորդորդ, այնուամենայնիվ, նպաստավոր էր: Բանն այն է, որ գրքում օգտագործված մեթոդներին ու ներկայացված տեսակետներին տվյալ ժամանակաշրջանում խիստ վերապահությամբ էին մոտենում ավանդական եկեղեցիները՝ Թե՛ Կաթողիկե և Թե՛ Ուղղափառ: Այն իրողությունը, որ Երվանդ վարդապետը կարողացել էր առանց խոչընդոտի նման աշխատություն հրատարակել Մայր Աթոռ Սբ. Էջմիածնի տպարանում՝ միանշանակ խոսում է հօգուտ այն փաստարկի, որ Հայոց եկեղեցին լայնախոհ վերաբերմունք ուներ դեպի ուսումնական գիտությունը, գիտական միտքն ու առաջընթացը: Դրանից բացի՝ շատ մտավորական հոգևորականներ քաջալերում էին Երվանդ վարդապետի եռանդը, ինչպես, օրինակ, ժամանակի նշանավոր մտավորական Մաղաքիա արքեպս. Օրմանյանը, Սուքիաս արքեպս. Պարզյանը. վերջինիս անձնական հոգածությամբ է տպագրվել վարդապետի երկասիրությունների մի մասը:

Հիշյալ հրատարակությանը հաջորդում է մեկ այլ կոթողային նշանակության բնագրի լույսընծայումը, որը հայրաբանական գրականության համար մեծ կարևորություն է ներկայացնում: Խոսքը վերաբերում է II դարի նշանավոր քրիստոնյա մտածող Լիոնի եպիսկոպոս Իրինեոսի «Ընդդեմ հերձուածոց» աշխատության չորրորդ և հինգերորդ գրքերին: Նշված երկը ստեղծվել էր գնոստիկյանների դեմ եկեղեցու պայքարի արդյունքում՝ դառնալով եկեղեցական դավանանքի զարգացման պատմության ուսումնասիրության համար կարևոր վավերագիր: Ի տարբերություն իր ժամանակների շատ ջատագույների, որոնք անտեսում էին ավանդույթը, Իրինեոսը հիմնվում էր բացառապես քրիստոնեական ավանդության վրա: Նա ստեղծագործել է հունարեն, սակայն նրա գործերից ամբողջությամբ պահպանվել են երկուսը՝ լատիներեն և հայերեն թարգմանությամբ: Երվանդ վարդապետի առաջարկով Իրինեոսի «Ընդդեմ հերձուածոց» երկն իր ուսուցչապետ Հառնակի և գերմանացի հրատարակիչ Հինրիխսի հավանությամբ 1909 թ. լույս է ընծայվում Սբ. Էջմիածնի տպարանում, ապա տպագրված մամուլներն ուղարկվում են Լայպցիգ, որտեղ 1910 թ. հրատարակվում են “Texte und Untersuchungen” ժողովածուում: Սա բարձր մակարդակի համագործակցություն էր ինչպես հայ և գերմանացի գիտնականների, այնպես էլ՝ հրատարակիչների միջև:

Թեպետև Երվանդ վարդապետը Մայր Աթոռում շարունակում էր իր գիտակրթական առաքելությունը, սակայն, միևնույն ժամանակ խորհում էր հոգևոր ասպարեզից հեռանալու մասին: Բանն այն էր, որ նրա՝ եկեղեցու բարեկարգման վերաբերյալ գրած հոդվածները պատճառ էին դարձել, որ եկեղեցական և մտավորական որոշ շրջանակներ բացասական, կասկածամիտ վերաբերմունք ձևավորեն վերջինիս հանդեպ: Այսպիսի միջնորդորդ, բնականաբար, հոգեբանորեն ճնշող պիտի լիներ երիտասարդ վարդապետի համար: Մյուս կող-

մից, սակայն, եկեղեցական բարձրագույն իշխանությունը քայլեր էր ձեռնարկում Երվանդ վարդապետին հոգևոր ասպարեզում պահելու ուղղությամբ, ինչպես գրել նա «Հուշեր իմ կյանքից» (2005 թ.) գրքում:

1910 թ. փետրվարի 9-ին Ե. վրդ. Տեր-Մինասյանը Մատթեոս Բ կաթողիկոսին դիմում է ներկայացնում իրեն ազատելու էջմիածնի միաբանությունից և դասելու Հայոց եկեղեցու աշխարհիկ հավատացյալների շարքը: Թեև նա հեռանում է եկեղեցականի ծառայությունից, սակայն ոչ երբեք եկեղեցուց:

Այնուհետև Ե. Տեր-Մինասյանը տարբեր ուսումնական հաստատություններում գլխավորապես զբաղվել է մանկավարժական գործունեությամբ: 1910 / 1911–1917 թթ. դասավանդել է Ալեքսանդրապոլի հայկական Արդուլթյան և առևտրական դպրոցներում, 1918–1919 թթ. Թբիլիսիի Հայոց ազգային խորհրդի անդամ և ուսումնական մասի վարիչ է եղել: 1919–1920 թթ. Երևանում և Ալեքսանդրապոլում պաշտոնավարել է որպես համալսարանների պրոֆեսոր, իսկ 1920–1921 թթ.՝ Վաղարշապատի II աստիճանի դպրոցի և մանկավարժական տեխնիկումի ուսուցիչ ու վարիչ: Այս ընթացքում գործուն թղթակցել է տարբեր թերթերի («Ախուրյան», «Հայրենիքի ձայն»)՝ իր հայագիտական և աստվածաբանական արժեքավոր աշխատություններով հարստացնելով մամուլի էջերը: Խորհրդային կարգերի հաստատումից հետո՝ 1921 թ., երբ հիմնվում է էջմիածնի կուլտուր-պատմական ինստիտուտը, Ե. Տեր-Մինասյանը դառնում է նրա առաջին գիտական քարտուղարը՝ աշխատելով 2 տարի: Նրա անմիջական նախաձեռնությամբ հիմնադրվում է «Բանբեր Հայաստանի գիտական ինստիտուտի» հանդեսը, որի շուրջ են համախմբվում ժամանակի լավագույն գիտնական-մտավորականները: Նրա հեղինակությամբ հանդեսում լույս են տեսնում հայագիտական նշանակություն ունեցող «Աբրահամ Խոստովանողի «Վկայք Արևելից»-ը և նրա ասորական սկզբնատիպը» հոդվածը և մի քանի գրախոսականներ («Բանբեր Հայաստանի գիտական ինստիտուտի», 1921–1922 թթ.): 1930–1931 թթ. նա նշանակվում է Երևանի մանկավարժական տեխնիկումի և Գյուղատնտեսական ինստիտուտի գերմաներենի դասախոս: Մանկավարժական տեխնիկումում Ե. Տեր-Մինասյանը պաշտոնավարում է միայն մեկ ուսումնական տարի, իսկ Գյուղատնտեսական ինստիտուտում՝ 17 տարի (1930/31–1946/47 թթ.), որից 2 տարի՝ միայն իբրև գերմաներենի դասախոս, իսկ 15 տարի՝ նորաստեղծ լեզուների ամբիոնի վարիչ և գերմաներենի դասախոս:

Մանկավարժական աշխատանքին զուգահեռ՝ Ե. Տեր-Մինասյանը չի դադարում հայագիտության հարցերով զբաղվել, և, հատկապես, այնպիսի կարևոր հարցերով, որոնք վերաբերում էին հայ Ոսկեդարին ու նրա վառ ներկայացուցիչներին: Այս շրջանում միտում կար վերանայման V դարի նշանավոր գործիչներին վերաբերող մոտեցումները՝ տարբեր մեկնաբանություններից ազդված կամ թե նոր մոտեցումներ առաջ բերելու մղումով: Ե. Տեր-Մինասյանը, լինելով պատմաքննադատական մեթոդի կողմնակից հետազոտող, միևնույն ժամանակ այն խորը համոզմանն էր, որ ցանկացած գիտական տեսակետ պիտի հաշվի առնի պատմական աղբյուրները, պիտի դրանց համեմատական քննություն վրա հիմնվի: Այս իմաստով 1943 թ. հատկապես մի քանի արժեքավոր հոդվածներ է հրատարակում նա՝ ի պատասխան նոր մեկնիչների՝ «Եղիշե Վարդա-

պետի «Վարդանանց պատմության» նորագույն քննադատը», Եղիշեի «Վարդանանց պատմության» մասին եղած քննությունների շուրջը», «Մովսես Խորենացու քաղկեդոնական լինելու առասպելի շուրջ»:

1943–1944 թթ. առանց պաշտպանության Ե. Տեր-Մինասյանին տրվում է բանասիրական գիտությունների դոկտորի աստիճան:

Ե. Տեր-Մինասյանի կենսագրության մեջ մասնավորապես առանձնանում է նաև 1946 թ., երբ լույս է տեսնում նրա «Ոսկեդարի Հայ գրականությունը» գրքույկը: Վերջինիս շուրջ մեծ աղմուկ են բարձրացնում կոմունիստական գաղափարախոսները՝ մեղադրելով նրան անցյալը իդեալականացնելու մեջ: Բնականաբար չարժեք անդրադառնալ այդ անհեթեթ մեղադրանքին: Միևնույն ժամանակ պետք է նկատել, սակայն, որ անցյալը միջնադարյան կղերաֆեոդալական եզրույթով բնութագրողներին, և այդ անցյալը համապատասխանաբար չճանաչողներին կամ թե այն մերժողներին, բնականաբար, դուր չ'աիտի գալին Ե. Տեր-Մինասյանի մեկնաբանությունները Հայ ոսկեդարյան գրականության և դրանց ստեղծողների վերաբերյալ: Ե. Տեր-Մինասյանի անձի շուրջ տեղի ունեցող այս զարգացումները, թերևս, ոմանք իշխող վարչակարգի և վերջինիս որդեգրած քաղաքականության հետ կապեն: Այս վարկածը ոմանք կարող են զարգացնել այն լույսի ներքո, որ Ե. Տեր-Մինասյանը տվյալ ժամանակաշրջանի կաթողիկոսական տեղապահ Գևորգ արքեպս. Չորեքչյանի հետ սերտ հարաբերությունների մեջ էր: Իհարկե, բավարար հիմքեր չկան այս տեսակետը պնդելու, սակայն, չի բացառվում, որ խորհրդային վարչակարգի գաղափարական առաջնորդները ինչ որ բան նկատելով, որոշել էին արձագանքել նախկին վարդապետին փորձելով այրվերապ հետո պահել վերջինիս եկեղեցական միջավայրից: Մանավանդ, որ կաթողիկոսական տեղապահը խոսք էր բացել Ե. Տեր-Մինասյանին վերստին եկեղեցական ասպարեզ վերադարձնելու մասին ինչպես տեղեկանում ենք վերջինիս «Հուշերից»:

1946 թ. Ե. Տեր-Մինասյանը գրաբարից աշխարհաբարի է վերածում և հրատարակում Հայ ոսկեդարյան գրականության լավագույն ներկայացուցիչներից մեկի՝ Եղիշեի կարևորագույն գործը՝ «Վարդանանց Պատմությունը», թարգմանությամբ, ներածական ուսումնասիրությամբ և ծանոթագրություններով: Սույն աշխատության քննական բնագիրն ուսումնասիրողը գիտական հանրության դատին է ներկայացնում 1957 թ.:

1943/44–1947/48 ուս. տարիներին Ե. Տեր-Մինասյանը Երևանի պետհամալսարանում պաշտոնավարում է որպես օտար լեզուների ամբիոնի վարիչ և գերմաներենի պրոֆեսոր: 1948/49–1949/50 թթ. ուս. տարիներին նա «Ոսկեդարի Հայ գրականությունը» գեկուցման պատճառով չէր աշխատում, իսկ 1950–1951 թթ. ուս. տարվանից կարողանում է վերականգնել իր դասախոսական իրավունքները և 1959–1960 թթ. ուս. տարվա վերջը կես դրույքով պաշտոնավարել Վ. Բրյուսովի անվան օտար լեզուների ինստիտուտում և պետական համալսարանում: Նրա մանկավարժական գործունեության վերջին տարին եղավ 1963–1964 ուս. տարին Վ. Բրյուսովի անվան օտար լեզուների ինստիտուտում:

Սկսած հիշյալ տարեթվից՝ Ե. Տեր-Մինասյանը թողնում է մանկավարժական աշխատանքը և գիտական գործունեության անցնում ՀՍՍՀ գիտությունների ակադեմիայի Հր. Աճառյանի անվան լեզվի ինստիտուտում:

Այս շրջանում նույնպես մի շարք արժեքավոր ուսումնասիրություններ և բնագրեր են հրատարակության պատրաստվում Երվանդ Տեր-Մինասյանի աշխատասիրությամբ, ինչպես, օրինակ՝ «Վերջին անգամ Ն. Ակինյանն ու Եղիշեի «Վարդանանց Պատմությունը», «Եղեմիայի Ժամանակագրությունը», «Միջնադարյան աղանդների ծագման և զարգացման պատմությունից» և այլն:

Ե. Տեր-Մինասյանը նաև թարգմանական և խմբագրական լուրջ աշխատանք է ծավալել ՀՍՍՀ պետհրատում և կուսհրատում (համապատասխանաբար՝ 47 անուն գիրք տարբեր լեզուներով և ավելի քան 15 աշխատանք): Նա թարգմանել է մարքսիզմ-լենինիզմի դասականների շատ գործեր, որոնք ինքն էլ խմբագրել է կամ մեկ առ մեկ համեմատել գերմաներեն բնագրերի հետ: Թարգմանական երկերի բնույթը, իհարկե, պայմանավորված էր ժամանակաշրջանի տիրող գաղափարախոսությամբ: Հայագիտությունը մեծապես կշահեր, եթե Ե. Տեր-Մինասյանին թույլատրվեր թարգմանել նաև գերմանացի այլ մտածողների, փիլիսոփաների և գիտնականների գործեր: Նրա գիտական պատրաստվածությունը լրիվ թերեզրեր են կրավարարներ նման ծրագիր իրագործելու համար: Ե. Տեր-Մինասյանը ծավալուն աշխատանք է տարել նաև բառարանների կազմման և խմբագրման ոլորտում (նրա աշխատանքների ընդհանուր թիվը կազմում է 135 անուն գիրք):

Գիտական հասարակությունը բարձր գնահատանքով է արտահայտվել Տեր-Մինասյանի գիտական և մանկավարժական գործունեության մասին և բազմիցս շնորհակալագրեր ուղղել նրան. ավելին, հանդիսավոր նշել է նրա ծննդյան 80 և 90-ամյա, ինչպես նաև՝ գիտական և մանկավարժական գործունեության 60 և 70-ամյա հոբելյանները:

ՀՍՍՀ գերագույն խորհրդի նախագահությունը 1964 թ. նրան շնորհել է «Հայկական ՍՍՀ գիտությունների վաստակավոր գործիչ» կոչում: ՀՍՍՀ լուսավորության նախարարությունը ժողովրդական կրթության բնագավառում կատարած բեղմնավոր աշխատանքի համար 1968 թ. նրան պարգևատրել է «Խաչատուր Աբովյան» շքանշանով: Ե. Տեր-Մինասյանը «գիտական երկարամյա բարեխիղճ և անբասիր աշխատանքի համար» արժանացել է նաև ՀՍՍՀ գիտությունների ակադեմիայի նախագահության պատվոգրերի, Մ. Մաշտոցի անվան Մատենադարանը նրան շնորհել է «Մեսրոպ Մաշտոց» շքանշան:

Ե. Տեր-Մինասյանը ստացել է նաև կառավարական պարգևներ. Հայրենական Մեծ պատերազմի ավարտի կապակցությամբ՝ «За доблестный труд» շքանշան և «Լենին» հուշամեդալ՝ ծննդյան 100-ամյակի կապակցությամբ և վերջապես ծննդյան 90-ամյակի և գիտական ու մանկավարժական գործունեության 70-ամյակի կապակցությամբ ՍՍՀՄ կառավարությունը նրան շնորհել է «Աշխատանքային կարմիր դրոշ»-ի բարձր շքանշանը:

Միևնույն ժամանակ տեղին է նկատել, որ դեռևս անտիպ են մնում նրա կողմից ստեղծված դասագրքեր, հոդվածներ և այլ աշխատություններ: Ուրախությամբ պետք է արձանագրենք, որ 2014 թ. Մայր Աթոռ Սբ. Էջմիածնի տպարանը նրա անտիպ աշխատություններից հրատարակեց «Հայոց Եկեղեցին», որը

ի դեպ, լայն արձագանք գտավ ինչպես Հայոց եկեղեցու պատմությունում զբաղվողների, այնպես էլ ընթերցասեր հանրության կողմից: Սբ. Էջմիածնի տպարանը 2009 թ. վերահրատարակել է նրա «Հայ եկեղեցու յարաբերությունները Ասորուց եկեղեցիների հետ մինչև 2 դարի վերջը» ուսումնասիրությունը, իսկ 2013 թ. «Ընդհանուր եկեղեցական Պատմություն, հատոր Ա, Հին եկեղեցին»: 2011 թ. «Արարատի ժառանգություն» շարքով հրատարակվել է նաև Ե. վրդ. Տեր-Մինասյանի հոգևածներն ու թարգմանությունները՝ ժամանակին տպագրված «Արարատ» ամսագրում: Ե. Տեր-Մինասյանի անձի և ստեղծած ժառանգության հանդեպ այս հետաքրքրությունը, բնականաբար, խոսում է այն մասին, որ այսօր էլ նրա արտահայտած տեսակետները, որդեգրած մոտեցումները, արված դիտարկումներն արդիական են մնում և՛ ասորագիտության, և՛ Հայագիտության տարբեր ոլորտների համար:

Ե. Տեր-Մինասյանի վաստակը գնահատվել է որպես խոշոր ավանդ մեր մշակութի պատմության գանձարանում: Նա իր մահկանացուն կնքել է 1974 թ. հուլիսի 12-ին:

Տ. ԳԵՎՈՐԳ ԵՊԻՍԿՈՊՈՍ ՍԱՐՈՅԱՆ

Պ. Գ. Թ. (ԵՊՀ), փ. Գ. Դ. (Դարեմի համալսարան, Մեծ Բրիտանիա), Մասյացոտնի թեմի առաջնորդ: Գիտական հետաքրքրություններ՝ Հայ եկեղեցու պատմություն, աստվածաբանություն, դավանանք: